



Broj: 13-11-5944/25-2
Sarajevo, 23.3.2026. godine

Na osnovu člana 69. Statuta Općine Centar Sarajevo – prečišćen tekst („Službene novine Kantona Sarajevo“, broj 23/04), Općinski načelnik donosi

O D L U K U

o poništenju Javnog poziva za dodjelu nagrada sportskim udruženjima sa područja općine Centar Sarajevo

I

Poništava se Javni poziv za dodjelu nagrada sportskim udruženjima sa područja općine Centar Sarajevo, broj 13-11-5944/25 od 27.10.2025. godine.

II

Ova Odluka stupa na snagu danom donošenja i ista će biti objavljena na web stranici Općine Centar Sarajevo.

O b r a z l o ž e n j e

Općina Centar Sarajevo je dana 27.10.2025. godine na web stranici Općine objavila Javni poziv za dodjelu nagrada sportskim udruženjima sa područja općine Centar Sarajevo, broj 13-11-5944/25 (u daljem tekstu: Javni poziv), u cilju dodjeljivanja nagrada za ostvarene rezultate na domaćim i međunarodnim sportskim takmičenjima.

Članom 6. Pravilnika o određivanju kriterija za dodjeljivanje nagrada sportskim udruženjima sa područja općine Centar Sarajevo („Službene novine Kantona Sarajevo“, br. 8/24 i 10/25) (u daljem tekstu: Pravilnik) utvrđeno je da se zahtjevi podnose za rezultate ostvarene u prethodnoj godini.

U tački 3. Javnog poziva za dodjelu nagrada sportskim udruženjima sa područja općine Centar Sarajevo, broj 13-11-5944/25 od 27.10.2025. godine, utvrđeno je da će se novčana sredstva dodijeliti za rezultat ostvaren u prethodnoj takmičarskoj sezoni.

Tokom obrade pristiglih prijava, a uzimajući u obzir neusklađenost teksta Pravilnika i Javnog poziva, Služba za obrazovanje, društvene djelatnosti, kulturu i sport je, cijeneći interese aplikantata, uvažavala dokaze o ostvarenim rezultatima u prethodnoj godini i u prethodnoj takmičarskoj sezoni.

Nakon obrađenih pristiglih prijava, objavljena je Preliminarna lista nagrađenih sportskih udruženja, broj 13-11-5944/25 od 17.12.2025. godine, a nakon toga i Odluka o odabiru korisnika za dodjelu sredstava za ostvarene vrhunske sportske rezultate, broj 13-11-5944/25

od 30.12.2025. godine. Navedenim dokumentima su utvrđeni iznosi sredstava koji se dodjeljuju za ostvarene vrhunske sportske rezultate, usklađeni sa članom 5. Pravilnika.

Ukupan iznos sredstava koji je trebao biti dodijeljen po osnovu nagrađivanja za ostvarene rezultate premašio je ukupan iznos sredstava definisan Javnim pozivom, što nije u skladu sa osnovnim konceptom budžetskih ograničenja prilikom raspisivanja javnih poziva, propisanim Smjernicama o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH”, broj 37/24).

S obzirom na uočene tehničke greške u tekstu Javnog poziva, te na činjenicu da važeći propisi ne predviđaju mogućnost naknadnog ispravljanja tehničkih grešaka nakon objave javnog poziva i završetka rangiranja, Općina je, u skladu sa načelima zakonitosti, transparentnosti i jednakog postupanja prema svim aplikantima, dužna postupati isključivo u okviru ispravnog i tehnički korektnog postupka.

Kako bi se osigurala pravna sigurnost i poštivanje principa jednakosti, odlučeno je da se predmetni Javni poziv poništi u cjelosti. Dodjela nagrada sportskim udruženjima može se provesti isključivo kroz novi javni poziv, uz otklanjanje tehničkih grešaka i jasno definisane uslove, usklađene sa važećim propisima.



Dostavljeno:

1. web stranica Općine
2. Arhiva